



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

Nr. ~~77~~/
8 prot.

Tiranë, më 25.02.2026

VENDIM

Nr. 1273, Datë 25.02.2026

“MBI AUTORIZIMIN E PËRQENDRIMIT TË PROPOZUAR PËR PËRFTIMIN E KONTROLLIT TË DISA ASETJEVE QË LIDHEN ME BIZNESIN ESTEE LAUDER BULGARIA EOOD NGA SHOQËRIA ORBICO BULGARIA EOOD”

Komisioni i Konkurrencës me pjesëmarrjen e:

Z.	Denar BIBA	Kryetar
Znj.	Leida MATJA	Zv/Kryetar
Znj.	Rezana KONOMI	Anëtar
Z.	Durim KRAJA	Anëtar
Znj.	Fatjola DELIJA	Anëtar

Në mbledhjen e tij të datës 25.02.2026, shqyrtoi çështjen me:

Objekti: Autorizimi i përqendrimit të propozuar për përfitim e kontrollit të disa asetjeve që lidhen me biznesin Estee Lauder Bulgaria EOOD nga shoqëria Orbico Bulgaria EOOD.

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit”, Udhëzimi “Mbi kontrollin e përqendrimeve ndërmjet ndërmarrjeve” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm, si dhe raportit të Drejtorisë së Analizës dhe Metodologjisë së Tregjeve “Rasti i përfimit të kontrollit të disa asetjeve që lidhen me biznesin Estee Lauder Bulgaria EOOD nga shoqëria Orbico Bulgaria EOOD.”,


VËREN SE :

I. Palët në transaksion dhe procedura

1. Autoriteti i Konkurrencës është njoftuar në lidhje me transaksionin e propozuar të përfundimit të kontrollit të disa aseteve që lidhen me biznesin Estee Lauder Bulgaria EOOD nga shoqëria Orbico Bulgaria EOOD.
2. Referuar dokumentacionit të depozituar, palët në transaksion janë:
3. **Pala Blerëse: Orbico Bulgaria EOOD** është një shoqëri me përgjegjësi të kufizuar, e themeluar sipas legjislacionit të Bullgarisë, me objekt aktiviteti tregti brenda dhe jashtë, tregti me shumicë, përfaqësim tregtar, ndërmjetësim, shërbime transporti, konsultime, reklama, informacione, servis, ndërtime, projektme, programim, marketing, si dhe çdo veprimtari tjetër të cilën nuk e ndalon ligji. Orbico Bulgaria EOOD kontrollohet plotësisht nga ORBICO d.o.o., shoqëri me përgjegjësi të kufizuar, e themeluar sipas legjislacionit të Kroacisë, me objekt aktiviteti blerja dhe shitja e mallrave, kryerja e ndërmjetësimit tregtar në tregun e brendshëm dhe të huaj, përfaqësimi i kompanive të huaja, transporti rrugor i mallrave, transporti i mallrave në trafikun ndërkombëtar, reklamim etj.
4. ORBICO d.o.o. është shoqëria mëmë e grupit të shoqërive ORBICO. ORBICO Group është distributor i një numri të madh markash, duke filluar nga produktet e kujdesit të bukurisë, produktet ushqimore dhe jo ushqimore, pajisjet teknike dhe elektrike deri në farmaceutikë, lodrat, tekstilet, cigaret, si dhe produktet e vajit motorik.
5. Shoqëria ORBICO d.o.o. zotëron 100% të kuotave të shoqërisë ORBICO SHPK, shoqëri me përgjegjësi të kufizuar, e themeluar sipas legjislacionit shqiptar, me objekt aktiviteti tregtim artikujsh industrial, import dhe eksport me shumicë dhe pakicë pijesh alkoolike, duhan, cigare, produkte kozmetike, karburante të ndryshme, vajra lubrifikantë etj.

Pala Shitëse:

6. **Estee Lauder Bulgaria EOOD** është një shoqëri me përgjegjësi të kufizuar, e themeluar sipas legjislacionit të Bullgarisë, me objekt aktiviteti import dhe eksport, shitje me shumicë, shitje dhe distribuim të kozmetikës prestigjioze, parfumeri dhe produkte të lidhura me kozmetikën, si dhe çdo veprimtari tjetër të cilën nuk e ndalon ligji.
7. **Estee Lauder Hellas S.A.** është një shoqëri anonime, e themeluar sipas ligjeve të Greqisë, me objekt aktiviteti tregtimin, importin, eksportin, marketingun, shpërndarjen, shitjen, furnizimin e produkteve kozmetike, farmaceutike, parfumeve etj; ofrimin e shërbimeve të konsulencës për të gjitha çështjet që lidhen me promovimin, krijimin, organizimin ndërtimin, marketingun, organizimin e programeve të trajtimit profesional etj.
8. Referuar skemës së depozituar, Estee Lauder Bulgaria EOOD dhe Estee Lauder Hellas S.A. zotërohen drejtpërdrejt nga shoqëria Estee Lauder Europe, Inc. (U.S.) dhe indirekt nga shoqëria The Estee Lauder Companies, Inc. (U.S.).
9. **Target:** target përfshijnë asetet fikse të përdorura në operimin e 7 (shtatë) dyqaneve fizike me pakicë të Estee Lauder Bulgaria EOOD, si dhe marrëveshjet kontraktuale dhe operacionale të nevojshme për vazhdimin e aktivitetit të biznesit. Dyqanet me pakicë të operuara nga Estee



Lauder Bulgaria EOOD janë të vendosura në ambiente tregtare të marra me qira nga Shitësi, të gjitha në territorin e Bullgarisë dhe shesin ekskluzivisht marka kozmetike premium.

10. Target nuk ka prani të drejtpërdrejtë apo indirekte në Shqipëri.

II. Përqendrimi

11. Më datë _____ ndërmjet shoqërisë Estee Lauder Hellas S.A. (Shoqëria) dhe Orbico Bulgaria EOOD (Shitësi me Pakicë) është nënshkruar "Marrëveshja e Furnizimit dhe Licencës".

12

13. Referuar shkresës nr. 77/3 prot. i AK, datë 12.02.2026 "Plotësim Informacioni", ndërmjet shoqërive Orbico Bulgaria EOOD (Blerësi) dhe Estee Lauder Bulgaria EOOD (Shitësi) janë nënshkruar "Marrëveshje për Blerjen e Aseteve" dhe "Marrëveshje për Blerjen e Mallrave" më datë 19 janar 2026. Bazuar në "Marrëveshje për Blerjen e Aseteve", shitësi shet, transferon dhe i cakton blerësit dhe blerësi blen nga shitësi, të gjitha asetet fikse, të cilat përbëjnë një pjesë integrale të kësaj marrëveshje dhe përfshijnë një listë me asete në dyqane të pavarura. _____

14. Referuar deklaratës së palës njoftuese, blerësi do të fitojë të drejtën për të operuar Dyqanet me Pakicë për shitjen me pakicë të kozmetikës selektive të klasit premium, si dhe të drejtën për të shpërndarë produkte kozmetike dhe të bukurisë që aktualisht janë pjesë e portofolit të Estee Lauder Bulgaria EOOD, duke siguruar vazhdimësinë e operacioneve të biznesit dhe praninë e pandërprerë të markave në tregun bullgar.

15. Pas përfundimit, Orbico Bulgaria EOOD do të ushtrojë kontrollin e vetëm mbi asetet dhe operacionet përkatëse të biznesit në Bullgari.

16. Bazuar në Udhëzimin "Mbi kontrollin e përqendrimeve ndërmjet ndërmarrjeve", pika 1.3 "Objekti i Kontrollit", parashikohet se: "Përfitimi i kontrollit mbi asetet mund të konsiderohet si një përqendrim, vetëm nëse këto asete përbëjnë ndërmarrjen si një e tërë ose një pjesë të saj d.m.th. një biznes me një përfaqësim në treg, e cila ka një xhiro vjetore tregu. Një transaksion në lidhje me asetet e pa-prekshme të tilla si markat, patentat ose të drejtën e autorit mund të

konsiderohet një përqendrim nëse këto asete përbëjnë një biznes me një xhiro vjetore. Në çdo rast, transferta e licencave të markës, patentave ose të drejtave të autorit, pa asete të tjera shtesë, mundet vetëm të plotësojë këto kritere nëse licencat janë ekskluzive në të paktën një territor të caktuar dhe transfertat e këtyre licencave do të transferojnë aktivitetin që gjeneron xhiroja. Nga licencat jo-ekskluzive mund të përjashtohen ato që mund të përbëjnë një biznes me vete, të cilat gjenerojnë xhiro në treg.”. Referuar deklaratës së palëve, Asetet Target kanë realizuar një xhiro vjetore tregu për vitin 2024.

17. Për sa më sipër, transaksioni i propozuar konsiston në përfitim të kontrollit të disa aseteve që lidhen me biznesin Estee Lauder Bulgaria EOOD nga shoqëria Orbico Bulgaria EOOD, duke plotësuar kriteret e parashikuara në nenin 10 dhe 12 të ligjit nr. 9121, datë 28.07.2003 “Për mbrojtjen e konkurrencës” dhe Udhëzimit “Mbi kontrollin e përqendrimeve ndërmjet ndërmarrjeve”. Si i tillë ky transaksion është objekt autorizimi nga Komisioni i Konkurrencës.

III. Analiza e konkurrencës

18. Referuar nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, si edhe Udhëzimit nr. 76, datë 07.04.2008 “Për përcaktimin e tregut përkatës”, treg përkatës do të konsiderohet tregu i shitjes me pakicë të produkteve premium kozmetike dhe të bukurisë, por duke qenë se transaksioni nuk do të ketë ndikim në tregun shqiptar si edhe duke iu referuar praktikave të mëparshme në çështje të ngjashme, tregu përkatës i produktit do të lihet i hapur. Treg përkatës gjeografik do të konsiderohet territori i Republikës së Shqipërisë.
19. Transaksioni i propozuar konsiston në përfitim të kontrollit të disa aseteve që lidhen me biznesin Estee Lauder Bulgaria EOOD nga shoqëria Orbico Bulgaria EOOD.
20. ORBICO BULGARIA EOOD është një shoqëri me përgjegjësi të kufizuar, e themeluar sipas legjislacionit bullgar, e cila kontrollohet 100% nga ORBICO d.o.o., një shoqëri aktive kryesisht në shitjen dhe distribucionin e produkteve kozmetike, ushqimore dhe jo ushqimore, farmaceutike, tekstile, etj. ORBICO d.o.o. është prezente në Shqipëri nëpërmjet ORBICO SHPK, e cila operon kryesisht në tregun e produkteve të konsumit të shpejtë (FMCG) dhe tregun e bukurisë në vend.
21. Target përfshin asetet fikse të përdorura në operimin e dyqaneve me pakicë të Estee Lauder Bulgaria EOOD në Bullgari, të vendosura në ambiente tregtare të marra me qira nga shitësi. Target nuk ka prani të drejtpërdrejtë apo indirekte në Shqipëri.
22. Transaksioni do të mundësojë Orbico-s të marrë përsipër dhe të vazhdojë shpërndarjen e produkteve të Shitësit si dhe operimin e dyqaneve të markave me pakicë në Bullgari.
23. Nga sa më sipër, Komisioni i Konkurrencës konstatoi se përqendrimi nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni i synuar nuk do të sjellë ndryshime në tregun shqiptar. Ky përqendrim nuk shfaq shenja të kufizimit të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese.

PËR KËTO ARSYE:



Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 "Për mbrojtjen e konkurrencës".

VENDOSI:

1. Të autorizojë përqendrimin e propozuar për përfitim e kontrollit të disa aseteve që lidhen me biznesin Estee Lauder Bulgaria EOOD nga shoqëria Orbico Bulgaria EOOD.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja "Për caktimin e shpenzimeve për ndjekjen e procedurave pranë Autoritetit të Konkurrencës".

Ky vendim hyn në fuqi menjëherë.

KOMISIONI I KONKURRENCËS

Leida MATJA

Zv/Kryetar

Rezana KONOMI

Anëtar

Durim KRAJA

Anëtar

Fatjola DELIJA

Anëtar

